



LE GOUVERNEMENT
DU GRAND-DUCHÉ DE LUXEMBOURG
Ministère de la Santé
et de la Sécurité sociale

Gemeinsam Äntwert vun der Madamm Ministesch fir Gesondheet a sozial Sécherheet, vum Här Inneminister a vum Här Minister fir Ëmwelt, Klima a Biodiversitéit op d'parlamentaresch Fro n° 2840 vum 8. September 2025 vum honorabelen Deputéierten Här Tom Weidig.

1) Den aktuellen Aktiounsplang „Drogendësch 2.0“ ëmfaasst 60 Moosnamen zur Bekämpfung vun Drogekriminalitéit zu Lëtzebuerg. Party-Droge wéi Ecstasy, „Kokain-Plateauen“ oder „Tusi“ ginn awer net explizit thematiséiert. Wéi schätzt d'Regierung d'Bedeutung vun de Party-Drogen am Gesamtkontext vun der Drogekriminalitéit zu Lëtzebuerg an?

Bis dato huet d'Police keng Kenntnis iwwer de Konsum, respektiv een existéierende Marché zu Lëtzebuerg vun der Drog « Pink Cocaine » / « Tusi ». Bis elo ass déi Substanz nach a kenger Analyse vum Laboratoire national de santé (LNS) nogewise ginn.

Beschlagnamung vu sougenannte Partydroge wéi Ecstasy goufe vun der Police scho gemaach während Festivitéiten, mee et konnt bis elo kee Marché vu signifikativer Gréisst zu Lëtzebuerg identifizéiert ginn.

2) Plangt d'Regierung spezifesch Preventiounscampagnen, fir iwwer Tusi opzeklären?

« El Tusi », « Tusi », « Tuci », « Tucibi », « Cocaina rosada » oder « Pink Kokain », si keng nei psychoaktiv Substanzen, mee Mëschprodukter wou eng ganz Rei verschidde Substanzen dra fonnt ginn.

Laut der European Union Drugs Agency (EUDA) bezéien sech d'Begrëffer « Tusi », « Tucibi » oder « Pink Kokain » an Europa normalerweis op Mëschunge vu psychoaktive Substanzen a Form vun engem rosa Pudder, an allgemeng Mëschunge vu Ketamin an anere Substanzen, wéi MDMA (3, 4-Methylenedioxyamphetamin - Ecstasy) oder aner Amphetaminnen. An deenen allermannste Fäll si Kokain oder déi synthetesche psychoaktiv Substanz 2CB detektéiert ginn.

Wéi uewen erwänt ass den « Tuci » e Mélange vu verschidde Substanzen déi séit laangem bekannt sinn an iwwer déi eng ganz Rei Informatiouns- an Opklärungsmaterial zu Verfügung stin. Dës gin och an der Präventiounsaarbecht an bei den Safer use a Safer party Mesuren a récréativen a festive Beräicher benotzt.

Am Moment gëtt et keng Unzeeche vun engem signifikative Konsum vun « Tuci » zu Lëtzebuerg.

3) Goufe schonns strategesch Asätz (z. B. geziilt Policepatrullen a Baren a Clubben) duerchgefouert, fir de Mëssbrauch vun de genannte Substanzen ze erfassen an ze bekämpfen? Wa jo, wéi vill a mat wéi engem Resultat? Wann nee, sinn esou Asätz geplangt?

Op Grond vun der Inexistenz, respektiv der Marginalitéit vun de viséierten Drogen, si bis elo nach keng cibléiert Kontrollen an Nuetslokaler wéi Baren oder Club'en vun der Police gemaach ginn.



4) Gëtt et eng Zesummenaarbecht mat Betriber aus dem Nuetsliewen, fir den „harm reduction“-Usaz ze stäerken, z.B. duerch Informatioun, Schnelltester oder „safe spaces“?

D'Associatioun 4motion (PIPAP) bedreift Sensibiliséierungsarbeit a festiven a récréativen Beräicher, duerch *safer use, safer sex a safer party* Interventiounen. Ee Service vir psychoaktiv Substanzen ze analyséieren (DrugChecking), deen e méi risikoarmen Konsum vun deene Substanze vir d'Konsumente viséiert an erméiglecht, gëtt och ugebueden. Mat der Initiativ *SaferNight* gëtt och eng Sensibiliséierung vun Evenementorganisateuren, Betriber aus dem Nuetsliewen, an d'Besëtzer vu Clubs a Baren ugestriift, vir inklusiv a sécher (e.g. safer spaces) festiv Evenementer ze fërderen.

Lëtzebuerg mëscht och beim europäesche Fréiwarnsystem fir geféierlech Drogen (EWS) mat, dee vun der European Union Drugs Agency (EUDA) koordinéiert gëtt.

Falls PIPAPO also am Kader vum DrugChecking oder den LNS eng nei psychoaktiv Substanz (NPS) oder eng geféierlech Vermëschung entdeckt, kann de LNS dat un de Point Focal Lëtzebuerg weiderginn, deen direkt mat der EUDA zesummeschafft.

Wann eng Substanz als besonnesch geféierlech agestuft gëtt, kann eng national oder europäesch Warnung (Drug Alert) ausgeléist ginn.

5) Lëtzebuerg féiert reegelméisseg Ofwaasseranalysen duerch – an déi weisen, dass Kokain-Réckstänn am europäesche Verglach relativ héich sinn, Cannabis och, anerSubstanze manner. Ginn et Pläng, fir „Pink Cocaine“ am Kader vun dësen Ënnersichunge méi genee ze tracken?

D'Iwwerwaachung vun dësen Droge fält net ënnert d'Virschreft vum der Direktiv iwwer d'Behandlung vum kommunalen Ofwaasser (Directive 2024/3019) an dës Parameter ginn dofir net vun de Gemengen a Gemengesyndikater gemooss.

6) Lëtzebuerg ass scho säit Laangem op der Kaart vun den internationalen Drogekarteller a spillt als Transitland eng ëmmer méi wichteg Roll am europäeschen Drogenhandel, haaptsächlech bei Kokain a Cannabis. Gëtt „Pink Cocaine“ méttlerweil och als Transitsubstanz erfaasst?

Well bis elo nach keng Beschlagnamung vun der Police vun « Pink Cocaine » zu Lëtzebuerg stattfonnt huet, leie keng Elementer vir, déi beleeën dass dës Drog duerch d'Land transitéiert.

Lëtzebuerg, den 9. Oktober 2025

D'Ministesch fir Gesondheet
a sozial Sécherheet

(s.) Martine Deprez